

حمدى رمضان

( أبو عمرو الريشى )

# دقوق الوجع

أشعار

صدرت الطبعة الأولى فى أكتوبر 2019



حمدى رمضان ( أبو عمرو الريشى )

## بطاقة الكتاب

عنوان المؤلف	دفوف الوجد
المؤلف	حمدي رمضان ( أبو عمرو الريشي )
التصنيف	أشعار
رقم الإيداع القانوني	15914 - 2019
عدد الصفحات	100 صفحة
رقم الإصدار الداخلي	480 الطبعة الأولى اكتوبر 2019
المقاس	20X14
تصميم الغلاف	مؤسسة النيل والفرات

جميع حقوق الطبع والنشر محفوظة للمؤلف، ولا يحق لأي دار نشر طبع ونشر وتوزيع الكتاب الا بموافقة كتابية وموثقة من المؤلف

### مؤسسة النيل والفرات للطبع والنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجي عبد المنعم



T H  
ALNILE WAALFOURAT  
مؤسسة  
النيل والفرات  
للطبع والنشر والتوزيع  
أسسها الشاعر ناجي عبد المنعم  
ح.م. 2017

رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 - 0120554372901 طيفاكس:

▶ f t n a g y e g y 2 0 0 6 4 @ g m a i l . c o m

▶ f t a l n i l w a a l f o u r a t @ g m a i l . c o m

( المقر الرئيسي: ج.م.ع. محافظة الشرقية - العاشر من رمضان - مجاورة 13 - امام سنترال 13 - عقار 304 )

# الإهداء

إلى أسرتي الصغيرة

إلى وطني الأكبر

إلى قرائي الأعزاء

أهديكم أشعاري وبعض من مشاعري

التي تليق بقلوبكم النقية

حمدى رمضان

# دفوف الوجد

دقي

دفوف الوجد

وغني

على أوتار حزني

وابني

مداين للهموم

وسط الضلوع ابني

يادنيا

كلي جراح

مفتاح الصبر ضاع مني

# ياساقيه

ياساقيه وربطانا فيك  
كفايه بقى شبعنا لف  
مربوط فيك ومتغمي  
وتديني كل كف وكف  
قولتي ارضى بنصيبك  
ما نطقت مرة حرف  
أنا برضه إبنك ضناكي  
ولا إنتي عقلك خف  
امتى هتطلع ميتك  
وارتاح بقى م اللف  
حمدي رمضان ابو عمرو الريشي

# ملحمة الشهداء

آه يا بلدنا آه  
وكل لحظه شهيد  
الحنن عشش ع الحيطان  
وأمتي يجينا العيد  
أرضنا وبحرا وجوا  
شهيد يوارى شهيد  
وشعب عايش ع الأمل  
وسط الديابيه غريب  
وبايه يفيد  
ومفيش يابلدي جديد  
على أرضها الطاهرة

والحق واقف من بعيد

آه من بعيد لبعيد

وآه يابلدنا آه

على دمعتك ياما

أمتى تروح الغمه

حارقة قلوبنا كلنا

والحلم فيكي عنيد

واقف ع حدودك

مليون بطل وشهيد

آه آه

آه يابلدنا آه

# مش ذنبهم

مكتوب عليك يا وطن

إنك تعيش حلمهم

وزي ما بيحلموا

لازم تحقق لهم

اللوم عليك أنت

والذنب مش ذنبهم

عارف الحقيقة وناكر

وحالف لتعبد صنم



# ميزانك

كمل ميزانك ووفيه

مالتقش عمي وخالي

الكل فيه اللي مكفيه

محدث م الهم خالي

## وش خشب

غير عوايدك والبس لها

الوش الخشب

طول ما إنت عايش كده

ياما هتشوف العجب

لو تعشق ترابها تبهدلك

اما إن بورت أرضها

تطرح سنابل دهب ..... وعجبي؟؟؟

# شمس الصبحيه

ياشمس. الصبحيه

يامغرقاته نور

يانسمه فوق ميه

عاشقه كل البحور

يابلد مشتاقه

لحظة فرح وسرور

لأمتي هيفضل حلمنا

مشتاق يشوف النور

# عاشق مصر

عاشق مصر

بترابها وأهلها وناسها

وكمآن قائدها

ما هو فرد من ضمن حراسها

وعشقت فيك الليل والمواويل واللمه

وناس بطبع جميل

بتسامح وتبوس على راسها

وعشقت نبلك

وعشقت يامصر مواويلك

ساعة الأذان كل الناس تدعيك

حتى الكنائس لما تدق اجراسها

وعشقت فيك  
طه ونجيب وحافظ وشوقي  
وأعلام كثير في الأدب تاج على راسها  
وأبطال كثير عايشين  
في قلوبنا من قبل مينا  
لجمال وأنور  
وجيشنا العظيم أمين حراسها  
وشوف من قبل الفراعنه  
لبعد الفتح لنصر أكتوبر  
لثورة شبابنا للشهيد اللي رفع راسها  
وإن كتب القلم  
يكتب كثير في حب مصر  
في نيلها في ترابها وأهلها وناسها  
مش بقولك عاشق

التراب وعاشق طين أرضها  
المروي بنيل جاري  
في ضلوعها زي أنفاسها  
ودي قصة عشق  
سبع تلاف سنه عمر الحضاره  
تسعين مليون في الأرض يدعولها  
وفي السما رب العباد يحميها ويحرسها

# حلم وفات

لما حياتك

تبقى سكات

لما يقولوا

دا حلم وفات

لما الدنيا

تبقى في عينك

زي كابوس

مليان بأهات

لما تبقى

في حالك عايش

لحظة

يقولوا حي ومات  
لما الحاضر  
يبقى جحيم  
والإحساس  
يفضل في سبات  
لما تحس  
إنك في غربه  
زي الموت ومعاه سكرات  
تبقى أكيد  
إنك مش عايش  
وخليك ذكرى لبعد ممات



# أنا العربي

أنا العربي  
وأنا اللي إتهان  
مايين جهل حكامي  
وبين الظلم والطغيان  
أنا العربي وكان ياما كان  
أنا السوري ..  
أنا السوري وأنا المقتول  
أنا اللي دمي كده بينزف  
أنا اللي بقالى سنين عايش  
في ليل على طول  
أنا اللي دمي متفرق هنا وهناك

مابين حكام

بتتآمر على موتي وحزب شيطان

فرنسي وروسي وأمريكي

وضيف ليهم كمان. إيران .

أنا المشرد في كل مكان

أنا اللي عايش هنا بينكم بدون عنوان

أصل أنا عربي رخيص الدم يا إنسان

وأنا الفلسطيني ..

أنا الفلسطيني وأنا اللي

دمي على الارض م العدو سال

أنا اللي عايش

سنين عمري تحت ظلم الإحتلال

أنا اللي على إيد الصهاينه

يوماتي بشوف إذلال

أنا المشرّد بدون عنوان  
مليش وطن ياويني  
ولا أخ جنبي يحميني  
يكون سندي ويكون لي أمان  
أنا عربي وخسارة أقول أنا عربي  
وأنا مشرّد في العالم مليش عنوان  
أنا المصري ..

أنا اللي قتلوا أصحابي  
وأنا اللي سجنوا أحبائي  
ويوم ما قلت ياثوره  
قالوا عليا إرهابي  
برصاص الغدر قتلوني  
وفي الميدان سحلوني  
وقالوا عليا عميل وجبان

أنا المصري أنا اللي اتهان  
وأنا اللي اتجرفت في الميدان  
أنا العربي وخسارة اقول انا عربي  
أنا اليمني .

أنا اللي سرقوا خيراتي  
أنا اللي نهبوا ثرواتي  
أنا اليمني أنا الإنسان  
أنا اللي خلوني أحارب إخواني  
أنا في نظرهم عميل وجبان  
بتآمر على بلادي وفيين بلادي  
أنا اليمني معروف حبي للأوطان  
كان السلم عنواني في كل مكان  
أنا اليمني ودي بلادي  
ودي روعي فدا الأوطان

# أنا العربي فوقه صحياااااااااااااا

## أنا العراقي ..

## أنا اللي بسكوت العرب

## عني أصبحت مهان

**أنا اللي إخواني بجهلهم قتلوني**

## وَجَابُوا عَدُوَّ خَاسِيَسَ وَجَبَانَ

# بيقتلني أنا وأخواتي

## بیہمر کل خیراتی

## وَبَيْنَ سُنِّي وَبَيْنَ شِيعِي الْفَرْقُ يَبَانُ

# أنا العربي

## والعربي رخيص الدم في كل مكان

## أنا اللبناني .

# أنا لبناني مهمش في كل مكان

## مش قادره حکومتی تحمینی

وحزب شيطان بيكويني  
أنا اللي سابوني العرب وحدي  
أقضي العمر في التوهان  
أنا العربي وكان ياما كان  
أنا الليبي .  
وأنا اللي اتفننوا في تعذيبي  
وأنا اللي تركوني  
سنين عايش تحت حصار  
سابوني الجهل عنواني  
مفيش منقذ مفيش أفكار  
ولما قلت يا ثورة قتلوني  
وقتلوا الثورة في مهدها بالنار  
ولسه دمي مانشفشي ولسه حصار  
وبرضه بقول أنا عربي

ولسه عايش في قلب دمار  
أنا العربي  
أنا الخاين في عيون أعدائي  
وأنا المهزوم في كل مكان  
أصل أنا عربي  
والعربي رخيص الدم في كل مكان

# تغيير مسار

كنتي مني

وكنت منك

ياللي قلبك

كان لي دار

عمري

ما اتصورت

أبعد أو

أغير المسار

عمري

ما استخسرت

حبي وكنتي



أجمل إختيار

كنت شایل

الحب ليكي

كنت عاشق

نور عنيكي

عمري

ما توقعت

إنك تعملي

تغيير مسار

# اتعلمي واتقدمي

فوقی

بقی واتقدمي

إزاي قادرة تعيشي كده

متلطشه من دا ودا

مش عايزه ليه تتعلمي

مش عايزه ليه تتقدمي

رغم إنك أقدم منهم

وكتير بيقولوا امهم

كفايه خنوع يام البشر

لو عايزه صحيح تتقدمي

كفايه نوم في العسل

كفايه شبعتي م الكسل

قومي انهضي

فوقي بقى واتعلمي

كل الأمم سبقوكي

بكام مليون سنه

وانتي في مكانك

عامله إنك بدمعي

دموعك دي تأثير بصل

ملهاش مكان

دايما في وسط الضلمه

تلاقي نور

فوقي بقى ياستنا

دا العلم نور

حسي ولادك ع العمل

كفايه نوم في العسل  
بلاش تقضي عمرك  
تقولي إيه اللي حصل  
عمرك ما هتقومي كده  
بالعلم بس تنهض الأمم  
ليه حاطه جوه الراس جزم  
ليه حالفه ليه ماتنهضي  
فوقي بقى واتعلمي  
مش أي حد  
تديه ودانك افهمي  
مش أي حد  
يمسك لجامك اتعلمي  
فوقي بقى يا أم الأمم  
فوقي بقى

لو كنتي عايزه تنهضي

فوقي بقى فوقي بقى

# أيام بتمر

أيام

بتمر بينا

نبكي

وتبكي علينا

عاشينها

غصب عنا

وماليه

الدموع عينينا

لاحد

حاسس بينا

ومفیش

حاجه بايدينا  
نعمل ايه  
في نصيبنا  
الله يعوض علينا  
وخدانا  
الدنيا يايا  
عاشين  
فيها غلابه  
ماليه  
الاحزان قلوبنا  
وعد  
ومكتوب علينا

# أقولها أزاي

بحبك

بس مش عارف

أقولها أزاي..

وكل دقيقة بشتاقلك

وبندهلك تكوني معاي

أقولها أزاي

أقولك إني حبيتك

وايه يعني أكيد عارفه

ماحبي ليك نار قايدة

وطول العمر بتمنى

يكون حبك قمر في سماي



أَقُولُهَا أَزَاي  
يَانْبِضُ الْقَلْبُ مِنْ جَوْه  
بِحَبِّكَ حُبٌ مَشْ عَادِي  
وَلَا هَادِي وَأَكِيدُ حَاسَهُ  
وَأَكِيدُ سَامِعَهُ كُلَّ نَدَاي  
أَقُولُهَا أَزَاي.

بِحَبِّكَ  
بَسْ مَشْ عَارِفْ  
أَقُولُهَا أَزَاي

# العرب فين

اجري

ياواد يامحمدين

قبلهم أشجب ودين

وقول

لحكام العرب

هو إنتوا فين

هي الرجولة

في دمكم فيروس خطأ

ولا أصبحتوا

يا عرب متصهينين

# الله اكبر

لما قالوا الله اكبر  
زلزلوا الارض بكلامهم  
خلوا صوت الظلم يهرب  
رجعوا الحق لصحابه  
والعدو من حقه يشرب  
لما قالوا الله اكبر  
والنهار أصبح يشقشق  
جابوا لينا نصر غالي  
والعزيمة في  
الولاد نار بتحرق  
أي غاصب جاي يفرق

تراب بلادي عن بلادي  
لما قالوا الله اكبر  
وابتدأ وقت العبور  
شفنا جند الله تكبر  
بسم الله الله اكبر  
لما قالوا الله اكبر  
السما شقت سحابها  
والجبال قادت عذابها  
لما سمعوا صوت ولادك  
لما قالوا الله اكبر  
رجعوا تراب بلادي  
في عز ما قالوا مش هتقدر  
لما قالوا الله اكبر

# مؤلم

مؤلم جدا

إنك تجرح

تنسى

القلب وقادر تفرح

تنسى الحب

اللي في عينيا

تنسى

أشواقي والحنية

تنسى

إنك كل ماليا !

وقادر تفرح

مؤلم جدا  
أبقى حبيبك  
تبقى حياتي  
وروحي في إيدك  
تبقى عني  
دايما غايب  
تنسى  
في يوم  
إن أحنا حبايب  
وقادر تفرح

# يعيش إزاي

أزاي يعيش  
وقلبيه ميت م الوجع  
ماهو لو فارق معاه  
وناسي يموت  
وعارف أنه فيك بيموت  
وعارف إنك قمره  
في سماه مكنش غاب  
أزاي يعيش  
من غير قمر  
وأزاي يعيش من غير  
عيونك تبقى

ضيه في الحياه  
في ليل طويل  
وهو برضاه ساب القمر  
ورافض  
يعيش ويا النجوم  
رافض يعيش ويا القمر  
على كوكبك أصله غبي  
أزاي يسيب ضي القمر  
ويرجع تاني للتراب ...



# أهي دنيا

أهي دنيا

والله وعایشنها

ياعم ماهي

دنيا مصالح

الخلو فيها

مش عاجب

شيطانها

فيها بقى صالح

نكذب لو

قولنا فاهمينها

إتبدل الصالح بالطالح

# وحدتي

خارج حدود وحدتي

بتكبر المسافات

عائش كما الميت

مابين ألم وسكات

شبع قولة آاه

والعمر عدى وفات

## مش عنتر

لا كنت يوم عنتر  
ولا أحب أدوار البطولة  
ولا أحب ألعب ع الحبال  
مبرمج حياتي بسهولة  
إنسان بسيط خطوتي  
بالله دائما موصوله

# كلام بكلام

كلام بكلام.

وأنا البادي

وإيه يعني لو أستغنى

ومش محتاج لوجودك

ما أنت خلاص

نسيت الود

ونسيت روحك

عديت كام

خطوه ف حدودك

ولا خليت خطوط

حمرا ولا سودا

نسيت نفسك

روح بجملة الماشيين

كثير زيك وأنا نسيتهم

رموشهم كانوا قتالين

وعلى فكرة!!

أنت يا حلو مش منهم

ف ليه

تتعجب بقى برمشك

طب هما كانوا حبايبنا

ويا ما أشتقتنا في غيابهم

بس أنت

يا حلو تطلع ميين. ؟

وميين أنت

عشان تتعجب برمش العين

وأنت مش  
في البال من أصله  
ولا هتكون في يوم حلمي  
بلاش تتغر في نفسك  
وتبقى مريض لأوهامك  
واستغفر ربك ميت نوبه  
ولا أسامحك على غلطك  
خلاص نزلت  
من عيني كما الدمعه  
وعمر الدمعة لو سقطت  
ما ترجع تاني نن العين .

## في الغربه

وأنت هناك في الغربه  
ابقى طمن قلبي عليك  
ابقى ابعتلي لو برساله  
مش تنساني الله يخليك  
أنا من غيرك تايه قلبي  
ليلي ونهاري أفكر فيك  
لو هتزيد الغربه ما بينا  
ابقى طمن قلبي عليك

# ست الحسن

مش لاقى

كلام يوصفها

وردة حب مرسومه

على عودها

في أجمل غصن

قالوا

عليها حوريه

وقالوا

عليها جنيه

وقالوا

جمالها زي السحر



خطفني  
جمالها من روجي  
غرقت  
معاها جوه البحر  
مش لاقى  
كلام يوصفها  
فسمتها بست الحسن

# معاك يا وطن

معاك يا وطن

إحساسي غير

أنا شخص رافض للتغير

حبي بلون كل العلم

الأسود بحزن الأمهات

الأحمر بلون دم الشهيد

الأبيض سنين وذكريات

بين ضلوعي بتنولد

معاك راح

أصبر ع اللي جاي

غصب عن اللي

بيسرقوك  
وبيحرقوك  
ويجو عوك  
ويعطشوك  
معجون بعشقتك  
يا بهيه م الأزل  
لا يوم هبيعك زيهم  
ولا يوم هحس بالملل  
ما أنتي عشقي  
يا بهيه من زمان  
رضعت عشقتك ف الصبا  
مفطوم على طيبة وحنان  
وحالف لما تندهي  
ألبي ليك كل النداء

لو حتى آخر شهقتي  
أنا تحت أمرك والنبي  
دمي رخيص  
بس أما تيجي تكتبي  
اكتبيني شهيد عيونك  
لأجل أموت فوق التراب  
وأنول كرامة الأوليه  
وأرجع لبطنك من جديد  
سامحيني بس والنبي  
ولما أموت  
على شهادتي وقعي  
عشان أكون شهيد عيونك  
والله تعالى يحفظك

# نبض قلب

وازاى أبعد  
وازاى أنساك  
وأنا العاشق  
وبعدك نار تكويني  
وازاى تقول  
نسيت حبك  
وحبك عاش بتكويني  
مليش غيرك  
وحبك فرض  
ياجمل عشق زیدینی  
ياروح الروح

يا نبض القلب  
يا نهر حنان بيرويني  
ازاي أنساك.

# شهقة موت

شهقة موت.

بتأخذ روعي وياها

بصوت مكتوم.

بلاقي الموت محاطني

منين ما بروح

سارق مني أفراحي

مبدل سما عيني غيوم

وأقول أصبر على بختي

يمكن بكرة يتبدل

يمكن حظي يتعدل

يشيل الفرح كل هموم

بعدك أنا تايه  
مليش حظ في الدنيا  
مقتول الحلم جوايا  
وم الآخر أنا محرووم  
أنا اللي من بعدك  
بقيت عايش على الذكرى  
مغلف كل لحظة معاك  
بطعم الحب  
أراجعها مع نفسي  
في الثانيه متين نوبه  
ورافض أعيش في الحاضر  
أنا اللي  
بأحزاني بقيت موصوم  
أنا الميت في إحساسي



وأنا الراض أكون ناسي

وأنا اللي كل لحظه

من غيرك بموت فيها

ميت موته

أنا قصة عشق حدوته

يحكوها

أهل العشق بالساعات

لا تقول قيس ولا عنتر

محفور عشقي

قبلهم م البدايات

أنا بداية العشق ونهايته

أنا اللي نهايتي

حزينه في الروايات

أنا اللي نازله ستارتي

بالاسود في الحكايات  
أنا الماضي وأنا الحاضر  
وأنا العاشق  
أنا اللي  
من بعدك بقيت محروم  
رافض دنيتي بعدك  
وأعيش ازاي  
من بعدك  
وأنا عيني جفاها النوم

# مليون سلام

مليون سلام

على كل

إنسان اتخدع

على قلب

ميت م الوجع

مليون سلام

وميت تحية

للي قال

عمري فداك

للي قال

أموت معاك

للي قال  
طير في سماك  
لا حد شاف ولا سمع  
مليون سلام.....

# ألف سلامة

ألف سلامة

كنت فين

لما إنجرحنا

لما دقنا المر ياما

لما قلتك

بحبك ليه تسييني

وقلت عادي

قلي حسيت بالندامه ؟

ولا عادي

زي بعدي زي قربي

ماهي مش فارقه العلامة

ألف سلامة .  
أتوجعت  
كثير في بعدي  
كان نهارك زي ليلاك  
كله ضلّمه  
ولا عدى ببتسامه  
والف سلامة .

# النهايه

النهايه

قالت خلاص

أحنا

وصلنا للنهايه

قتلت بإيدها

حبنا قبل الأوان

نسيت

خلاص

حبي لها

عشقي لها

قالت كلام

من ظلمها  
شق الألم  
صدر الزمان



# آخر كلام

آخر

كلام

راح أودعك

عشان تكون

دايما بخير

من غير

عتاب أو ملام

وأتمنى أشوف

وشك.... بخير

عشان حياتك

عندي أغلى من حياتي

هطلق سراحك  
رغم دمعي وأهاتي  
ياللي عندي  
أغلى من كل الوجود  
هبعد بعيد  
عشان تكون دايمًا بخير

# كل أغاني الحب الحلو

كل أغاني

الحب الحلو

أنا غنيتهم ليك

كل معاني

ولحن الغنوه

بهديهم لعنيك

حتى أغاني

عذابي وجرحي

لحظة حزني

ولحظة فرحي

لحظة وأنا

مشتاق لحنائك  
لحظة ضعفي  
وأنا قدامك  
لحظة خوفي  
وقلبي عشائك  
ياللي القلب شاريك

## سابق الدلال

يا سابق في الدلال  
يا واخذ ع الأسيه  
اسمحي أسأل سؤال  
راحت فين الحنيه  
ولا إنت خلاص يا جميل  
ناوي تسقيني الويل  
يا سقيني المر كله  
وتقول لي ميه ميه  
راحت فين الحنيه  
أشرب مرار وراضي  
وتقولي اشرب دا عادي

ولأمتي أفضل أدادي  
وانت بتأسي عليا  
يافايتني وقلبي عليل  
دا نهاري أصبح ليل  
ياتاعبني وأنا مشتاق  
راحت فين الحنيه

# كلمة فراق

أكثر شيء يبكي

هي كلمة فراق

لما تبان الحقيقة

وتكتشف الذواق

.....

وشوش وكانت

في حياتي مذوقه

عايشه في قلبي

من زمان ومروقه

كانت تسبب في

حضني كل الهموم

كانت تبكيني

وتجرح كل يوم

وكأنها على جرح

قلبي متشوقه

.....

راحت خلاص ملهاش

في قلبي اليوم مكان

راحت خلاص وكفايه

جرحي يا الزمان

باعك يا قلبي بعد

ما ادितه الأمان

الله يجازي العشق

ويجازيه..... بقی

.....



اوعى يا قلبي تقول  
ليا في يوم حبيب  
اوعى تقول كان  
الدوا وكان الطبيب  
اوعى يا قلبي في  
كذبهم ظنك يخيب  
سابوك يا قلبي  
وخلوا حياتك شقى  
دي كانت وشوش  
في حياتي مذوقه  
عاشت في قلبي  
وطول زمانها مروه  
خلاص يا قلبي انسى  
اللي كان وانساه بقى

# المنحوسه

صباح الخير

يامنحوسه ياموكوسه

ياغارثه المر في ضلوعي

ياشايله الحزن فوق راسي

ياكاتبه الفرحة في كراسي

لكن المده منسيه

ممسوح السطر م الأول

ولما أسأل عن الفرحة

تقولي الفرحة. ( عمول )

تقول امشي بلاش غلبه

وامشي وليكي كلي حنين

لكن قلبي عليكى حزين  
واقولك بس في سري  
كفايه عليك  
اللي عارفينك  
وسارقينك  
وشافطينك وبايعينك  
وشيلاهم فوق كتوفك شيل  
دي عشرتهم تهد الحيل  
ف ليه ساكته ياموكوسه  
وجواكي منهم حمل ثقيل  
أنا ياستي مش فارق  
أموت م البرد أو م الجوع  
مأنا ياما مت في سنينك  
وأنا عاشق وسخ طينك

وأنتي ولا حاسه ولا شايفه  
لأ. أكيد حاسه وأكيد شايفه  
وحزنك شايله فوق كتفي  
ولحظة ما تيجي وتحسي  
بيخدوكي ويسرقوك مني  
وبحزن بس وبغني  
وأقول فيكي كام موال  
وأغنيك رغم بؤس الحال  
وأقول يمكن في يوم ترضي  
تحن عليا ست الناس  
وأعمل خدي ليكي مداس  
وأقول أكيد  
راجعه وأكيد سامعه  
وعامله روحها

تقلانه .. وآه يانا ..  
بتدلع بنت ابن إمحاح  
ملكه عفيه بين أميراح  
الناس حاسدينها لجمالها  
وبتخطط تنول منها  
وهي عاشقه للماضي وللحكايات  
بتضحك ضحكه ملعونه  
عشان عرفانه بنعشقا  
ونموتوا فيها ساعات وساعات  
اصل احنا شعب كثير طيب  
ويوم ما بتندهي ولادي  
بكنتب أروع الحكايات  
وتخلص الحدوته  
وياخدوكي تاني من روحنا

ويحطوا الملح في جروحنا  
بدون مايطببوها زين  
نغمض عين وعين صاحيه  
بتحرس من بعيد لبعيد  
ونرجع تاني للموال  
نغني غنوة ليلة العيد  
( ياليلة العيد أنستينا )  
وليه يابلادي تنسينا  
ولادك هما تراب أرضك  
فبلاش ببياده تدوسينا

.....

# الإحساس

والإحساس

إنك تشتاق لي

زي ما أنا ديمًا بشتاق لك

الإحساس

بيكون عالي

لما تبقى مستاق أكثر

ونبض القلب

يكون مش عادي

مشاهد صعب تتكرر

وعيش بقي بإحساسك

حب نبطي أو عبطي

ما هيش فارقه  
مشاعر رافضه تتغير  
نفس الصور والألوان  
رسومات ع الحيطه بهتانه  
وكام شخصية عشناها  
تقول ليلي تقول جوليت  
أو قصص عشق حمصانه  
ياما حكوها قدامنا  
أسف أنا مقدرش أتغير  
مقدرش أكون غير نفسي  
مجنون العشق جوايا  
مافيش رتوش وع المكشوف  
يا أما تقول ضاع الحب  
يا أما تقولي عشقانه



وفي الحالتين أنا عاشقك  
مافيش في قلبي لحظة خوف  
لكن الدنيا لهيانا  
هروبك برضه مش فكرة  
وردك يعكس إحساسك  
لو قلت كتير بشتاق لك  
ألاقي الدنيا سمعانا  
وليه الخوف  
راجع دايما إحساسك  
أكيد غلطان  
ما تقولش الدنيا وخدانا  
أكيد العيب مش في الحب  
مهما قلت  
أكيد العيب جوانا

# كلام مسروق

راسم

معاني كلمته

عاشق

مع معشوق

ماشي

يبيع الحروف

في كل

نصبه وسوق

لو ينطق جوجل لقال

كل كلامه

مسروق.... وعجبي

# بحاول أنسى

بحاول

أنسى والدموع

جوه قلبي كالمطر

اللي باعني

قلب أقوى م الحجر

هانت

عليه عشرة سنين

باع حبنا

وباع الحنين

وكأني

كنت لقلبه يوم

رحلة  
رجوع من السفر  
وأعمل  
إيه في اللي  
كان أغلى حبيب  
كان الدوا  
وكان الطيب  
سابنا خلاص  
في ليل طويل  
ومن ساعتها ما أفكر  
وأعمل إيه

# قلبي سكن

لا قلبي كان لك سكن  
ولا حبي هيكون زاد  
على قد حبي ليك  
ما بقتش اخاف م البعاد

# قلمي يمرض

قلمي يمرض  
لكن مايموتش إحساسه  
معروف بطبعه  
الوفي شهم بين ناسه  
عمره ماخان  
كلمته حافظ ف كراسه  
إن الأصيل أصيل  
الحر معروف اوصافه

# سن القلم

سن القلم مابقاش  
خلاص يكتب حروف  
نزعوا ورق حريره  
وخطوا مكانه الخوف  
لا عارفين نعيش خدم  
ولا نبقى فيها ضيوف

# مش هندم

أنا مش

هندم ع اللي بايعني

واللي بإيده مقدر نيش

روح اتفضل جرب غيري

بس ياريت وما ترجعليش

بعد ما بعت حناني وحبتي

بعد ما شفت دموعي وألمي

بعد ما مات العشق ف قلبي

حبك ضاع وما يلزمني



# ازاي

تقول وحشتك

وأنت

بخلان... بالحنان

وازاي

تقول كلمة بحبك

ومعاك

محسنتش.. بأمان

ولا هو

الحب زادك

لما يخلص

تقول..... كمان

## غربه

دي غربه ولا موت  
وليه سبتتي فيها  
هي الحكايه سكوت  
وأيام ..... تعديها  
روحي مفارقه الجسد  
والبعد ..... كاويها  
مجروح وكلّى ألم  
كاره ..... غناويها  
غربتي مش بالبعداد  
ولا بالسؤال تحليها  
غربتي حاسك بعيد

بعد اما  
كنت ف دنيتي ماليها  
ارجع كفايه ..... بعد

.....

# رباعيات

-----

## 1

ارمي حمولك على الله  
وزي ما ترسي دقلها  
لا هم تشيل ولا تحزن  
دا ربك قادر يعدلها

## 2

ياللي بحرك مالوش أمان  
كل يوم يغرق قلوب  
هو أنت ليه ناسي الحنان  
مع أن فيك قلبي بيدوب

### 3

قومي اخلعي توب الوجع  
وسدي ع الحزن البيان  
افتحي حضنك للربيع  
زي نسمة حاضنه للغيطان

4

أنا قلبي نسيكي على فكرة  
وبقيتي فيه يادوب ذكرى  
من عقلي بحاول أمحيها  
وخليكي بشوقك مش فاكهه

5

طول عمري  
عائش ف بحورك  
بالطول والعرض  
حاكم لهواكي  
وسماكي سنه  
وكماني فرض  
اتلموا  
عليكي شياطينك  
فجبوكي الأرض



6

لو

كان البعد

عني يريحك

أنا أريحك

راح أبعد

عشان ترتاح

عشان شمسك

تنورك مسا وصباح

## محتوى الكتاب

2	بطاقة الكتاب
3	الإهداء
4	دفوف الوجد
5	ياساقية
6	ملحمة الشهداء
8	مش ذنبهم
9	ميزانك
10	وش خشب
11	شمس الصباحية
12	عاشق مصر
15	حلم وفات
17	أنا العربى
24	تغيير مسار
26	اتعلمى واتقدمى
30	أيام بتمر
32	أقولها إزاي
34	العرب فين

35	..... الله أكبر
37	..... مؤلم
39	..... يعيش إزاي
41	..... أهى دنيا
42	..... وحدثى
43	..... مش عنتر
44	..... كلام بكلام
47	..... فى الغربية
48	..... ست الحسن
50	..... معاك ياوطن
53	..... نبض قلب
55	..... شهقة موت
59	..... مليون سلام
61	..... ألف سلامة
63	..... النهاية
65	..... آخر كلام
67	..... كل أغانى الحب حلوة
69	..... سايق الدلال
71	..... كلمة فراق

74	..... المنحوسة
79	..... الإحساس
82	..... كلام مسروق
83	..... بحاول أنسى
85	..... قلبى
86	..... قلمى يمرض
87	..... سن القلم
88	..... مش هندم
89	..... إزاي
90	..... غربة
92	..... رباعيات
98	..... محتوى الكتاب